



# Ақмешіт

18 сәуір  
сейсенбі  
№31 (1938)  
2023 жыл

Газет  
1994 жылдың 15 сәуірінен  
бастап шығады

• Қалалық қоғамдық-саяси әлеуметтік-  
ақпараттық тарихи-танымдық газет •  
E-mail: akmeshit.kz@mail.ru

## апталығы

### «ЖАЙЛЫ МЕКТЕП»: ҰЛТТЫҚ ЖОБА ЖҮЗЕГЕ АСА МА?

Биыл «Жайлы мектеп» ұлттық жобасы аясында білім ошақтарының құрылысы басталады. Бұл өңірлердегі мектеп тапшылығын, үш ауысымды және апатты жағдайдағы білім ұяларын жою мақсатында жүзеге асырылмақ.

Жоба аясында 2025 жылға дейін елімізде 842 мың оқушыға арналған жаңа үлгідегі мектептер пайдалануға беріледі деп жоспарлануда. Сондай-ақ 100 мыңнан астам жұмыс орнын ашу көзделген.

Жалпы пилоттық жоба туралы Мемлекет басшысы Қасым-Жомарт Тоқаевтың халыққа Жолдауында айтылған еді. Онда: «Жайлы мектеп» ұлттық жобасы қолға алынды. Біз 2025 жылға дейін 800 мың баланың заманауи мектепте оқуына жағдай жасаймыз. Осылайша, апатты жағдайдағы және үш ауысыммен оқитын мектеп мәселесін толық шешеміз. Бұл ауыл және қала мектептерінің айырмашылығын едәуір азайтады. Мектеп салу Үкімет және әкімдіктер үшін басты міндеттің бірі болуы керек. Жемқорлар сотталғанда, олардың заңсыз тапқан қаржысы мемлекетке өтіп, түгелдей мектеп құрылысына жұмсалуға тиіс. Үкімет осы бастаманы заң тұрғысынан рәсімдеу туралы шешім қабылдауы керек» делінген.

Президент Жолдауындағы айтылған тапсырма биыл бастау алады. Жаңа да жайлы мектеп бірыңғай құрылыс стандартын сақтай отырып балалардың қауіпсіздігін қамтамасыз ете алатын, пәндік бөлмелер мен зертханалары толық жабдықталған, 1-4 және 5-11 сынып оқушылары үшін бөлек оқу аумағы мен спорт залы бар, ерекше білім беру қажеттілігі бар балалар үшін тиісті жағдай жасалған оқу орны болуы қажет.

2 БЕТТЕ



### «АУЫЛ – ЕЛ БЕСІГІ»: ЕЛДІ МЕКЕНДЕР КӨРКЕЙЕДІ



Осы жылы қалада тұрғын үй құрылысын дамытуға, әлеуметтік және инженерлік инфрақұрылымды жақсартуға ұлттық қордан, республикалық және облыстық бюджеттерден барлығы 53 млрд теңге бөлініп, ірі жобалар жүзеге аспақ. Осы жобалардың ішінде ауылдық елді мекендерде атқарылатын игі істер қамтылған.

Жақында қала әкімі Асылбек Шәменов қалаға қарасты ауылдық округтер мен қос кентті аралап, тұрғындармен кездесіп, талап-тілегін тыңдап қайтты. Сол кездесулерде шаһар басшысы «Ауыл – ел бесігі» бағдарламасы аясында қолға алынатын жұмыстарды саралады.

– Биыл ауылдарға ерекше көңіл бөлінуде. Тұрғындардың талап-тілегіне сәйкес, қажетті шаралардың барлығы атқарылады деп жоспарлануда. Бұл жұмыстар мұнымен тоқтап қалмайды. Желел әрі жүйелі істің нәтижесінде «Ауыл – ел бесігі» бағдарламасы арқылы республикалық бюджеттен қомақты қаржы бөлінді, – деді қала басшысы.

2 БЕТТЕ

Су тапшылығы бүгінгі де, болашақтың да өзекті мәселесі. Суға ерекше көзқарас болмаса, мәселе тереңдей беретіні шындық.

Бұл орайда сөзден гөрі іс керек екені даусыз. Су тапшылығы және климат өзгеріс жағдайында егіншілікті жүргізу бағытында ғалымдар тарапынан қандай тұжырымдар жасалауда деген сұрақ көкейде бар екені рас. Осы орайда Сыр бойындағы ғылым мен білімнің қарашаңырағы – Қорқыт ата атындағы Қызылорда университетінің «Су шаруашылығы және жерге орналастыру» кафедрасының профессоры, техника ғылымдарының докторы, ҚР ауыл шаруашылығы ғылымдары академиясының академигі Серікбай Өмірзақовпен әңгімелесудің сәті түсті.



## Су бар жерде өркеніш боларды

Ғалым университеттегі Қазақстан Республикасының еңбек сіңірген гидротехнигі Мәделхан Нәлібаев атындағы су шаруашылығы музейін көрсете жүріп, әңгіме тиегін ағытты.

### Мәңгі жасайтын сала

Жалпы Сыр өңірі мал шаруашылығымен және егіншілікпен айналысып келе жатқан аймақ. Әсіресе 1965 жылғы КОКП-ның мамыр пленумынан кейін Қазақстанның барлық өңірінде су шаруашылығы және мелiorация қарқынды дамып, нәтижесінде аймағымыздағы бүгінгі күні пайдаланып отырған күріш суару жүйелері салынып, егіншілік пен мал шаруашылығы қарқынды дамыды. Бүгінгі күнгі Сыр бойының келбеті сол кездерде бастау алып, республикаға мақтан етерліктей елді мекендердің

іргетасы қаланды және аймақ экономикасының негізін осы ауыл шаруашылығы құрады. Өңірде құрылыс, су шаруашылығы мекемелері, арнайы жылжымалы механикаландырылған трестер мен колонналар құрылып, су және жер ресурстарын тиімді пайдалану жүзеге асты. Осы кезде республикада арнайы су мамандарын даярлайтын жоғары оқу орны ашылып, облыс орталығында Қызылорда гидромелиоративтік техникумында білікті мамандар даярланды.

Кейін елімізде жүргізілген реформалар нәтижесі су шаруашылығына да әсерін тигізіп, қиыншылықтар тудырды. Дегенмен бұл саланың өзектілігі бүгінгі күні артып, жаңаша мазмұн алуға. Себебі «Су – тіршілік көзі» демекші, аймақтың ауыл шаруашылығының дамуы тікелей Сырдария өзенінің су жағдайына байланысты.

4 БЕТТЕ

«Ауыл аманаты» пилоттық жобасы жүзеге аса бастады. Бұл жоба – ауыл тұрғындарының әл-ауқатын жақсартуға, олардың табысын арттыруға бағытталған. Сондай-ақ жобаға қатысу ауыл шаруашылығы өнімдерін өндіру ісін жаңадан бастағандар үшін жақсы қолдау болмақ.

### ТӨМЕНГІ ПАЙЫЗБЕН НЕСИЕ БЕРІЛЕДІ



Кеше қала әкімдігінің баспасөз орталығында қала әкімінің орынбасары Дінмұхамед Ермеков БАҚ өкілдеріне брифинг берді.

– Бағдарламаны іске асыру үшін биыл Қызылорда облысына 3 млрд теңге бөлінді. Ал несиелерді беру маусым айынан бастау алады деп жоспарланған. Айта кету керек, бағдарлама аясында ауыл тұрғындары жеңілдетілген несие алып, техниканы лизингке рәсімдей алады. Қарыз алу шарттары да өте тиімді, себебі ондағы пайыздық мөлшерлеме әлдеқайда төмен. Мәселен, несие мен микронесие мерзімі – 5 жыл.

Ал мал шаруашылығы және ауыл шаруашылығы кооперативтерін құру саласындағы жобалар бойынша

7 жылға дейінгі мерзімге 2,5% жеңілдетілген мөлшерлеменен шағын несие алуға мүмкіндік береді, – деді қала әкімінің орынбасары.

Мұндай несиенің халыққа пайдалы болары анық. Сондықтан да ауылда қандай да бір өндіріс ашып, оны дамыту үшін бұл – үлкен мүмкіндік. Пилоттық жоба аясында микрокредиттерді беру үшін сенім білдірген өкіл ретінде «Байқоңыр» ӘКК» ҰК» АҚ белгіленіп, «Өңірлік инвестиция орталығы» МҚУ бөлімшесі арқылы іске асырылады деп жоспарлануда.

Ақтолық НҰР.ЛЫБАЙ





